



12. oktoberi 2016

UKA2016/49

**Ukiut qulit ingerlaneranni angujartuaarneqartussamik nunatsinni suliffeqarfinni sulisorisat sapinngisamik amerlanerpaat nunatsinneersuunissaat siunniullugu, Naalakkersuisut UPA 17-mut saqqummiunneqartussamik periusissiamik suliaqarnissaminut peqquneqarnissaannut Inatsisartut aalajangiiffigissaattut siunnersuut.**

(Inatsisartunut ilaasortat Kalistat Lund aamma Múte Bourup Egede, Inuit Ataqtigiit)

Inatsisartunut ilasortat Kalistat Lund aamma Múte Bourup Egede Inuit ataqtigiit siunnersuuteqarput nunatsinni suliffeqarfiit sulisui amerlanerpaat nunatsinneersuunissaat siunniullugu Naalakkersuisut upernaakkut 2017-mut saqqummiussaqaqqullugit saqqummiussamullu soqutigintumut isummersussaagut.

Nunatsinni sulisinnaasut tamarmik atorineqarnissaat aammalu nunaqavissut atorluarneqarnissaat Partii Naleqqamiit pingarluinnartutut isigaarput nunami Naalagaaffinngorniartoq inumminik sullinneqassaaq tamannalumi pissusissamisoorpoq.

Ukiorpasuarni oqallisigaarput maani nunaqavissut annertusiartortumik atornerulertariaqarigut. Isumaqarpugut taamatut oqalliseruusaarneq qimallugu aallartittariaqalersugut kiammi tupigissavaa nunap nammineq inuni atorlugit sullissineq aallartinneqarpat.

Nunatsinni ilinniarsimasut kalaallit amerliartuinnarput aammalu tamanna pissusissamisoorluinnarpoq ilinniarsimasullu amerlasuut uggornartumik namminneq nunaminni suliniartut nalilersorneqartarput misilittagaqannginnavit illit tigusinnaanngilatsigit.

Pissutsit tamakku Naalakkersuinikkut akueriunnaarlugit maani nunaqavissunik sulisoqarnissaq pisortanngortitsisarnissarlu pilersaarusiukkamik aallartittariaqalerpagut ajornaqaaq taamatutn aallartinngikkuta ineriartorneq misilittakkallu maani nunami pigilernavianngilagut ilisimasat tamaasa maani sulinikkut pissarsiat aallarussuinnarneqarsinnaajunnaartariaqarput.

Sulisunik pikkorissaanerit nunaqavissunut sammitinnerusariaqalerpagut tassami siunissami sulisorpassuarnik tikerartitsiinneq ingerlaannassanngitsoq pisinnaasat maani nunaqavissunut piginnaangorsaanikkut salliutinneqartariaqalerput.

Kalaallit sulisinnaasut illersorlugit oqalukkaangatta amerlasoorpassuarnik oqarfigineqartarput ammit qalipaataanik immikkoortitsigit. Taamatut oqartoqartarnera ilumuunngivippoq, tassami kiap tupigissavaa nunap inui salliullugit sulinerit ingerlaanneqartariaqartut kalaallinik illersuilluni oqartarneq ammip qalipaataanik immikkoortitsinerunngilaq ilumoortorlu unaavoq maani kalaallit nunaqarmata aamma sulinermi sumiluunniit minnerutitaanatit atorineqartariaqartut.

Pisortanik sullissinermi selskabit ingerlannerini maani ilinniarluarsimasut kalaallit atorneqarulerteriaqarput aammalu siulersuisunik ikkussuinermi. Takoreerparpummi kalaallit pisortanngoraangata uummat ingerlatsinerlu allanngortartut tamannalu takuarput KNI-mi Royal Arctic Line-mi nersopagullu taakku.

Umiarsuaatigut sinersortaait, pajuttaait, imarpikkoortaait, minnerunngitsumillu kilisaataatigut, maani apeqquserneqanngivissumik nunaqavissunik kalaallinik tamakkiisumik inuttalersorneqartariaqalerput utaqqiinnarpummi atorneqarnissaminnut.

Kilisaatit nalaagaat aqumiut inuttallu kalaalinnngortariaqalerput apeqquseruinerit nunaqavissunut atuukkunnaarlunnartariaqarput ajornaqaaq nunaqqatigut ilinniarteriarlugit atorumanagillu inuiattut kinaassuseqassagutta ilinniarsimasuutigut atorniartigit uagutsinnut pilliutigaluta ingerlanerput tassa unittariaqalerpoq massakkut.

Sumi nunaqarpa namminneq innuttaminnik annerusumik atuinngitsumik? Sumi nunaqarpa nammineq ilinniarsimasuutimik atuinngitsumik? Sumi nunaqarpa nammineq innuttaminnik ilinniarsimasunik misilittagaqannginnerarlugit apeqqusersuisumik? Sumi nunaqarpa avataaniit tikisitanik sulisoqaannarlutik ingerlasunik? Tassa periusissiamik misissuisoqarnaniluunniit maani nunaqavissunik atuinissaq aallartinniartigit.

Sunaana periusissiaq misissorniaripput ? Maani nunaqavissut atorneqassanngillaat? uagut taamatut isumaqanngilluinnarpugut, tassa aallartinniarta misissugassaqaanngilugut inuit kalaallit atorneqarnissaminnik utaqqiinnarput. Tassa naatsumik oqaatigalugu tassa naammaleqaaq.

Maani nunami sulissagaanni piumasaqaateqanngippallaaqaagut. Tassami maani kalaalerpassuit amerlaqaat ilinniarfinni ilinniarsinnaanngitsut, suliffeqarfinni sulisinnaanngitsut qallunaartunngooq oqalussinnaannginnamik tamannalu ingasappallaarujussuaqaaq.

Maanigooq ilinniarfinnut kalaallisuinnaq oqaasillit isersinnaanngillat qallunaatunngooq oqalussinnaannginnamik. Akerlianillu allat kalaallisut oqaluussinnaanngitsut periarfissat tamarmik ammallutik, sumi nunaqarpa namminneq innuttaminnik oqaatitsit atorlugit iliniaqusaangitsunik? Ilinniartut amerlasuut uniinnartarput qallunaat oqasiinut piginnaasatik killeqarmata, ilinniartunngooq soraarummeernerminni amerlasuut angusinngitsoortarput namminneq oqaaserinngisatik atorlugit soraarummeeqquneqaramik.

Tamannalu ingerlaseq allanngortitariaqalerpoq kalaallisut oqaatsigut atorlugit ilinniarsinnaanerit amerlasuut ammaffineqartariaqalerput.

Akerlianik tikisitanut piumasaqaanngilugut maani sulinissaannut. Piumasaqalertariaqarpugut maani pisortanik sulissagunik pinngitsooratik maani oqaatsit tassalu kalaallit oqaasii pinngitsooratik atussagaat.

Tassa aallartiffeqartariaqalerpugut piumasaqaateqarluta, tassalu pinngitsoornani siullerpaaq tassaasariaqarpoq kalaallisut oqalussinnaanissaq, tassami taamaliunngikkuta maani misilittakkagut sulinermilu ilisimasassagut annerulernaviannngillat tamannalu siunissaq isigalugu akissaqarfiginngilarput taamatut ingerlaannarnissamut.

Kinaassuserput nakuunerulissappat taava nunaqavissut kalaallit maani sulisorineqarnissaat nukittorsarlunnartariaqalerpoq, tamannalu anguneqarsinnavoq aatsaat nunaqavissut salliutillugit sulineq aallartillugu ilisimasat taava maani pigineqalerlutik katersorneqalissapput inuiaallu tullusimaartut nammineq nunaminnik ingerlatsisut pilersinneqassapput, kingunerissavaa Kalaallit nunaat naalagaaffik innuttamik aqunneqarluni sullinneqartoq tamannalu Partii Naleqqap anguniagaasa pingaarnersaraat nuna inummik pigineqarluni ingerlanneqartoq.

Siulitta tunniussaas nuna allanut tunniutissanngilarput, tarnitta nalunngilaa uagununa nunarput erligalugu illersugassarput!

Taamatut oqaaseqarluta ataatsimiititaliami susassaqtumi suliarineqassasoq innersuupparput.

Hans Enoksen